

Communicaziun a las medias – Cussegl dal public SRG.R – 01/2019

La purschida per uffants sin rtr.ch fa quaidas da sfegliar

Cuiria, ils 20-02-2019

Il Cussegl dal public (Cdp) da la SRG.R è s'occupà cun la purschida per uffants tar RTR, las revistas da l'onn ch'èn cumparidas l'onn 2018 en in nov vestgì e cun ils rapports davart il sport regiunal. Per l'emprima giada è er il nov president da la SRG.R, Vincent Augustin stà da la partida a la seduta dal Cdp.

Fa quaidas da sfegliar, illustrà bain, infurmativ – quai è mo trais dals numerus chavazzins positivs ch'il Cussegl dal public (Cdp) ha duvrà cun prender sut la marella la purschida per uffants tar RTR. En spezial menziuna il Cdp las chanzuns, rimas, poesias ch'ins po per part betg mo leger, mabain er tadar e telechargiar sin www.rtr.ch/uffants. Che questa purschida stat a disposiziun en tut ils idioms plascha medemamain fitg bain al Cdp. Quai saja en questa furma betg mo attractiv per uffants e lur famiglias, mabain er per personas che vuessan emprender rumantsch u per uffants che na san anc betg uschè bain rumantsch. Il Cdp animescha dentant da propagar pli fitg questa purschida che stuess vegnir derasada anc blier pli fitg.

Revista da l'onn cun accent sin testas dal 2018

Sin rtr.ch han ins pudì sfegliar il december passà en in chalender tut spezial, en ina spezia chalender d'advent ch'era il medem mument er ina revista da l'onn. Davos mintga fanestra sa zuppava ina istorgia. Il Cdp chatta che quai saja ina buna idea da purtar ina revista da l'onn en questa furma plitost nunconvenziunala che sa differenziescha da las revistas tradiziunalas. Il chalender plascha fitg bain e dat ina buna survista da quai ch'è passà. Grategias fitg bain èn era las illustraziuns che Jon Bischoff ha fatg exclusivamain per questa revista. Il sulet che saja in zic donn ch'ins na possia betg cliccar directamain dad ina fanestra a l'autra. Ins stoppia mintgamai returnar a la survista per midar fanestra. Il Cdp cusseglia – cun intginas remartgas per optimar grafica e tschertga – da cuntinuar cun questa furma da chalender.

Ina segunda furma da revista è stada publitgada davent dals 23 da december en ils Cuntrasts focus, en il radio ed en il Telesguard. Là èn vegnids preschentads temas ord vista da las personas pertutgadas. Las elecziuns grischunas èn per exempel vegnidas commentadas da Jon Domenic Parolini e la debatta No Billag ord vista da Ladina

Heimgartner. Era questa revista ha fatg ina fitg buna impressiun. Entras las personas pertutgadas che raquintan sa sajan ins sentì pli manaivel al capità.

Sport regional vegn scrit grond tar RTR

Il Cdp ha analisà ils livestreams dal giu dal CB Lumnezia cunter l'US Schluen-Glion, ils rapports davart Tavau nordic, la Cuppa Spengler, il Tour de Ski Müstair, ils gieus da hockey dal HCD e la purschida da sport online sin rtr.ch. En general sajan ils rapports fitg interessants ed i vegnia moderà a moda cumpetenta. Surtut il livestream dal giu da ballape ha plaschì ordvart bain. Il Cdp giavischa anc dapli livestreams, perquai che quels sajan da gronda valor per il public rumantsch. Ils rapports da las occurrenz da sport surregionalas valitescha il Cdp sco fitg professiunal. I dettia adina bellas istorgias a l'ur ed ils moderatur fetschian ina buna impressiun cun moderar live dals events da sport. Quai che pertutga la Cuppa Spengler sa dumonda il Cdp sch'i fa propi senn da commentar quest event mundial en questa moda e maniera en il radio, cunquai che la Cuppa Spengler vegnia emessa en la televisiun. Tenor il Cdp tanschessi er da sa restrenscher cun ils rapports sin las raits socialas.

In sguard enavant

Il nov president da la SRG.R, Vincent Augustin è stà impressiunà da la lavur preziosa dal Cussegl dal public. El ha prendì part sco giast a la seduta da quest gremi.

En la seduta dal matg metta il Cussegl dal public il focus sin ils gieus dal Radio Rumantsch. I na vegn betg mo analisà ils gieus: Kikeri6, Tge chaussas e Top 3, mabain er fatg propostas per novs gieus.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79, telefonin 078 722 53 73